

## Upendo na Haki Vyapatana

*Fadhili na kweli zimekutana, Haki na amani zimebusiana.*—Zaburi 85:10.

**M**ungu pekee anaweza kukuongoza kutambua hivyo rehema, upendo na uvumilivu Wake ili uwe na imani ambayo inafanya kazi kwa upendo na kutakasa nafsi. Hii ni karama ya Mungu. Ni kuufungua moyo ili ulipokee neno ambalo ni kama majani ya mti wa uzima. Hebu Mungu na aujaze moyo wako kwa upendo Wake, ili kwamba uweze kusemwa kwamba umeisafisha roho kwa kuutii ukweli.

Kumwamini Yesu na kupokea neema Yake ibadilishayo sio kazi ya kubahatisha, bali ni kazi inayofanya utakatifu wa Kristo ukisiwe katika akili na tabia. Pale unapopata uzoefu huu, utasema, “Nimeonja na kuona ya kuwa Bwana yu mwema. Bwana Yesu atakuwa sehemu yangu milele.” Nguvu ya msalaba itaanzisha ndani yako chemchemi za ajabu za tumaini na kicho, kuabudu na upendo.

Malaika wanaangalia na kungoja na watashuhudia ukweli kwamba ulimwengu hauko nawe. Yesu amekukuta ukiwa umeketi miguuni Pake ili kujifunza kutoka Kwake, Njia, Kweli na Uzima. Tangu sasa, ukiyasalimisha mapenzi yako kwa mapenzi ya Yesu, unaingizwa kwenye eneo ambapo msalaba unakuwa mada ya thamani. Ulimwengu unafifia akilini mwako. Utukufu unaong’aa toka katika lango la mbinguni unakuwa mvuto wote wa ushawishi. Huu utajiri wa neema ya Kristo unakushikilia katika utii wa hiari... Utakachofanya tu ni kufurahia kuwapatia vengine karama uliyoipokea.

Ninatamani kuona ukitumia vizuri vipaji ambavyo umepewa na Mungu ili kwamba uweze kuitikia swali hili, “Yanipasa nifanye nini nipate kuokoka?” Hebu maneno yasikike kutoka katika midomo iliyotakaswa, “Pokea wokovu kwa kumpokea Yesu kwa imani kama Mwokozi wako binafsi.” *Mungu ni upendo.* Mwenye dhambi hataangamia ikiwa atatumia imani katika nguvu ya ajabu ya msalaba wa Kristo. Msalaba ni wenye manufaa sana ambapo juu yake upendo na haki ya Mungu vimeunganishwa.

Ni kwa kile kilichofanyika pale msalabani ndipo mwenye dhambi anapata wokovu.... Picha ya upendo Wake imechorwa akilini kiasi kwamba haiwezi kamwe kufutiliwa mbali. Kisha kusulubiwa kwa Yesu Kristo kutawekwa wazi mbele yako kiasi kwamba utakuwa mshirika wa heshima ya mateso Yake. Nina shauku kubwa sana kwamba uweze kutazama katika kiini cha fumbo hili kuu, na kugundua kwamba tafsiri yake ni upendo....

Unapoyasalimisha kikamilifu mapenzi yako kwa mapenzi ya Mungu, njia yako kwa njia ya Mungu, utajifunza kutoka Kwake Yeye aliye mpole na mnyenyekevu wa moyo na kisha utapata raha nafsi mwako. Imani tulivu itakuongoza.... Utapata uzoefu wa wazi zaidi na zaidi wa uwepo wa daima wa Mwokozi Aliyepo wakati wote. Hili litapatia nafsi nguvu ..., ambayo mabadiliko ya hali ya dunia hayawezi kuidhoofisha. Inaikita miguu juu ya mwamba imara (**Letter 123, 1901**).